

## Kapítulo 14

# DOKTRINA DI PROFESIA

Ta importante pa nota e punto di salida di mormonnan promé ku nos studia loke nan ta siña ta bai sosodé den futuro. Nan ta kere ku kasi tur hende—ku eksepsyon di e "yunan di pèrdishon"—lo ta salvá finalmente. Pa un gran parti, e doktrina aki ta determiná nan otro siñansanan eskatológiko.

### I. MILENIO

Mormonnan ta kere ku Kristo lo bolbe físikamente na mundu. Pero promé ku esei por sosodé, hudiunan mester reuní na Israel i tambe e mormonnan lo reuní milagrosamente na "Sion," esta Independence, Missouri na Merka. Mester tin un reino mundial mormon promé ku Kristo por bin.

Ora Kristo bolbe, E lo reina durante milenio, un era di mil aña di pas i trankilidad. (Satanas lo ta mará durante e tempu aki.) Su dos kapitalnan lo ta e Herusalèm bieu (na Israel) i e Herusalèm nobo (esta Independence, Missouri).

Malbadonan lo ta matá na komienso di e milenio, i nan spiritunan lo keda den e "prisón di spiritu" pa e mil aña. Hopi bon hende ku no ta mormon lo biba durante e periodo plasentero aki, i Evangelio lo ta prediká na nan. Tambe, hende lo tin oportunitat di batisá pa tur e mortonan for di komienso di tempu. Kristo i e santunan resusitá lo dirígí e trabou aki den tèmpel. Hende lo yega na edat di shen aña, anto lo ta transformá na nan estado inmortal.

Na fin di e milenio Satanas lo ta di lòs i lo instigá un rebelion kontra Dios. Algun hende ku ta biba riba mundu na fin di e milenio, i algun di e malbadonan ku ta resusitá na fin di milenio, lo uni ku Satanas den e esfuerso aki. Esnan ku ta uni ku Satanas lo bira "yunan di pèrdishon." Satanas i su ehèrsitonan lo ta derotá den e último bataya aki. Despues di esaki, morto finalmente lo ta destruí.

Ora milenio kaba, mundu lo disolvé i "resusitá" den un estado selestial, yen di lus i gloria manera solo i streanan. (Di bèrdat tur e gran streanan i solo ku nos ta mira awor ta un mundu ku a wòrdu glorifiká.) Mundu lo ta kambiá pa un estado selestial pa hende ku ta alkansá un estado selestial por poseé e mundu selestial pa semper.

### II. HENDE INMEDIATEMENTE DESPUES DI MORTO

Unda spiritu di mortonan ta bai, wardando nan destino etèrno na fin di milenio? Segun mormonnan "E mundu aki (di spiritunan sin kurpa) ta dividí den dos parti: paraíso ku ta e habitashon di e hustu, i fièrnu ku ta e habitashon di e malbado..."<sup>1</sup>

Nan ta siña ku tin un lugá unda e malbado lo sufri pa su piká promé ku milenio, "prisón di spiritu" (fièrnu). Esaki ta un purgatorio. E lo resusitá na e di dos resurekshon.

Di otro banda, e mormon su spiritu ta bai "Paraíso" despues di su morto i ei e ta warda pa e "promé resurekshón." Mientras nan ta warda, nan ta prediká e evangelio mormon na esnan ku ta den e "prisón di spiritu."

### III. PURGATORIO MORMON

Segun doktrina di e Santunan, kasi niun hende lo eksperensia e segundo morto. Si esei ta e kaso, kon ta splika ku un malbado por yega na shelu perfekto i santu ku tur su piká? Pa solushoná e problema aki, mormonnan a inventá purgatorio.

Ora un malbado muri e ta bai na e "prisón di spiritu," un lugá ku por yama "purgatorio" (maske mormonnan no ta yam'é asina) pasobra aki e malbado lo tin chèn di purifiká su mes dor di su sufrimentu arepintí. Na fin di e milenio nan lo por sali for di e purgatorio aki. Presidente Joseph Fielding Smith a bisa:

"Ta un dekreto ku e inhustu lo mester keda den e kasprisón prepará pa nan durante e periodo di mil año unda nan por arepintí i purifiká nan mes pa medio di e kosnan ku nan lo sufri."<sup>2</sup>

Heber C. Kimball, miembro di e promé presidensia, a skirbi tokante e purgatorio aki:

"Esei ta stimando e malbado, pa manda nan ayá na fièrnu pa wòrdu kimá te ku nan ta purifiká. Sí, nan lo bai aya i keda aya i kima, manera un pipa bieu ku ta hole stinki pa motibu di tantu uso i pasobra e ta bieu, te ora ku nan a kima te kaba, anto nan spiritunan por ta salvá den dia di Dios todopoderoso."<sup>3</sup>

"Boso a tendémi papia ku frekuensia di mi famianan...nan lo ta salvá manera mi a konta boso...; nan lo bai fièrnu promé i keda ei te ora e dekadensia den nan ta kimá i sali afó; i dia lo yega ku nan lo bin serka mi i rekonosémi komo nan salvador, i mi lo redimí nan i saka nan for di fièrnu pa e lugá unda mi ta biba i hasi nan mi sirbidónan; i gustosamente nan lo drenta mi servisio."<sup>4</sup>

E siñansa ku hende tin chèn di ta purifiká di nan piká no solamente ta kontradisí Beibel<sup>5</sup>, ma e tambe ta kontradisí *Buki di Mormon*:

"Pasobra ata'ki, e bida aki ta e tempu pa hende prepará pa bai serka Dios, si, wak e dia di bida aki, ta e tempu pa hende efektuá nan obranan...mi ta roga boso pa boso no posponé e dia di boso arepentimentu, te na final; pasobra despues di e dia di bo bida aki, kua ta wòrdu duná na nos pa prepará pa etèrnidad, ata, si nos no mihorá e uso di nos tempu mientras nos ta den e bida aki, e ora ei ta bini e anochi di skuridat den kua ningun obra por wòrdu hasí. Boso no por bisa, ora boso yega na e krísis teribel ei, ku lo mi arepintí, ku lo mi bolbe na mi Dios. Nò, boso no por bisa esaki ...Pasobra ata awor, si boso a prokrastiná e dia di boso arepentimentu te na morto, ata'ki, boso ta suhetá na spiritu di diabel, i e ta seya boso na dje; asina ku, Spiritu di Señor a retirá di boso, i no tin lugá den boso, i diabel tin tur poder riba boso; i esaki ta e estado final di malbadonan" (Alma 34:32-35).

### IV. RESUREKSHON

Segun siñansa mormon, lo tin dos resurekshon. Den esun promé, na komienso di e milenio, e mortonan ku a kere, esta mormonnan, lo resusitá, i huntu ku mormonnan ku ta na bida lo

topa Kristo den laira i baha kun'E. Tambe esnan ku nunca a tende e Evangelio, lo tuma parti den e promé resurekshon.

E di dos resurekshon, e resurekshon di tur malbado, lo sosodé na fin di e milenio.

E señora mormon ta hañ'é den un situashon prekario. Durante e seremonia di seyamentu etèrno na su esposo pa medio di matrimonio selestial den un tèmpeel mormon, tantu brùit komo brùidehòm ta haña un nòmber sekreto. Nan ta prohibí di revelá e nòmber aki. Asta e brùit no ta pèrmití di sa e nòmber sekreto di su esposo. Pero ta masha importante pa e esposo sa i kòrda nòmber sekreto di su esposa, pasobra na e resurekshon si e esposo no yama e nòmber sekreto di su kasá, e esposa lo no por resusitá. Si e hòmbler lubidá e nòmber sekretu di su esposa òf pa malu ta keda sin yama su nòmber sekretu, e pobersita esposa ta sin speransa.

## V. DESTINONAN ETERNO

E destinonan etèrno di hende ta kai den kuater kategoria. E promé di e kategorianan aki ta esnan ku ta bai na e lugá ku algun mormon ta yama "fièrnu" òf e "segundo morto."

### A. Fièrnu

Ken ta bai na e lugá teribel aki? Mormonnan ta kontestá ku tin dos grupo distinto.

Un grupo ta konsistí di diabel i su angelnan. Diabel den su estado pre-eksistente a rebeldiá kontra Dios huntu ku un tersera parti di e angelnan. "Lúsifer ta Pèrdishon. El a bira asina dor di rebelion abierto kontra e bèrdad, un rebelion kontra lus i konosementu...Rebeldiando huntu ku ne tabatin un tersera parti di e spiritunan di e ehrsitonan di shelu. Esakinan tur tabata siguidónan (òf den otro palabra yunan) di pèrdishon."<sup>6</sup> P'esei nan ta kondená pa eksistí den un estado etèrno sin kurpanan. Nan no por arepintí.

E di dos grupo, "e yunan di pèrdishon," ta "esnan ku den e bida aki a haña un konosementu perfekto di e divinidat di e meta di e evangelio, un konosementu ku ta bin solamente pa revelashon di Spiritu Santu, i ku ta uni nan mes ku Lúsifer i ta rebeldiá abiertamente, tambe ta bira yunan di pèrdishon. Nan destino, despues di nan resurekshon, ta pa wòrdu saká huntu ku diabel i su angelnan, pa eredá e mésun reino i e estado unda 'nan bichi no ta muri, i e kandela no ta paga."<sup>7</sup> Pues nan ta hende ku bon konosementu di e bèrdad ku tòg a rebeldiá kontra djE. Pero mormonnan ta splika ku "un hende no ta bira yu di pèrdishon pasobra el a nenga e bèrdad i bandoná e iglesia, sino ku e tabatin basta lus pa e bira un yu di pèrdishon."<sup>8</sup> Esaki mormonnan ta yama e piká inporonabel, òf blasfemia kontra Spiritu Santu. Masha poko hende lo ta yunan di pèrdishon. "Kon afortunado ku den e misèrikòrdia di Dios lo tin komparativamente poko ku lo tuma parti den e sufrimentu teribel i skuridat etèrno."<sup>9</sup>

Mormonismo no sa sigur si kastigu etèrno lo dura pa tur etèrnidat. Di un banda, e *Buki di Mormon* ta bisa:

"...esnan ku ta manchá pa diabel i su angelnan; i nan lo bai den kandela etèrno, prepará pa nan; i nan tormento ta manera un tanki di kandela i suafel, kua su vlamnan ta subi pa semper i no tin fin" (II Nefi 9:16).

*Doktrina i Aliansanan* tambe ta di akuerdo:

"P'esei, e ta salba tur ku eksepshon di nan—nan lo bai den kastigu etèrno, esta kastigu sin fin, esta kastigu etèrno, pa reina ku diabel i su angelnan pa etèrnidat, unda nan bichi no ta muri, i kandela no ta paga, ku ta nan tormentu—i fin di esei, ni lugá di esei, ni nan tormentu, ningun hende sa..." (76:44-45).

Ma di otro banda José Smith a skirbi den e mésun buki mormon sagrado, *Doktrina i Aliansanan*, "Sinembargu, no ta skirbí ku lo no tin fin na e tormentu aki, ma ta skirbí tormentu sin fin" (19:6). Tambe Joseph Fielding Smith, e di seis presidente di iglesia mormon, a skirbi: "Nos ta siña di *Doktrina i Aliansanan* ku kastigu etèrno, òf kastigu pa semper, no ke men ku un hende kondená lo sufri kastigu pa semper."<sup>10</sup>

Kontrali na e "segundo morto" ku solamente e poko "yunan di pèrdishon" lo sufri, tin un destino etèrno plasentero ku hopi lo gosa. *Buki di Mormon* ta menshoná solamente dos lugá unda hende por bai despues di morto; shelu òf fièrnu. Ma doktrina mormon ta siña ku tin tres shelu òf "reino" distinto, i dependiendo kon bo ta pará spiritualmente ora bo muri lo determiná na kua di e tres shelunan bo lo bai.

"Kontrali na e puntonan di bista hañá den siñansa no inspirá i kredunan di kristianismo moderno, tin reinonan di gloria den etèrnidad na unda finalmente tur hende resusitá lo bai (ku ekspeshon di e yunan di pèrdishon). Esakinan ta nombrá: selestial, terestrial, i telestial—e gloria di kada un siendo fuera di komprendementu mortal."<sup>11</sup>

## B. E Reino Telestial

E reino telestial ta un shelu ku lo ta na un otro mundu. Ken ta esnan ku lo por drenta e shelu aki ta? Segun teologia mormon, nan ta e grupo di mas grandi: "...e habitantenan di e mundu telestial, ku nan no por wòrdu kontá manera streanan den firmamentu di shelu, òf manera santu na kantu di laman" (*Doktrina i Aliansanan* 77:109). E apòstel mormon, Bruce R. McConkie, ta laga sa ku "mayoria adulto ku a biba desde Adam (ku a nenga Kristo i a biba malu) lo bai den e shelu telestial...Nan lo ta un kantidat sin fin di hende di tur edat ku a biba segun sistema di mundu; ku tabata karnal, sensual, diabóliko; ku a skohe e filosofia banu di mundu na lugá di aseptá tètimonio di Hesus; ku ta gañadónan i ladronnan, hasidónan di bruha i adulteronan, blasfemadónan i asesinonan..."<sup>12</sup> Tambe nan ta esnan ku no a "risibí e evangelio, ni tètimonio di Hesus, ni e profetanán, ni e aliansa etèrno" (*Doktrina i Aliansanan* 76:101).

No ta interesá mormonnan ku Beibel ta kontradisí e doktrina aki bisando ku "e kobardenan, i e inkrédulonán, i e abominabelnan, i e matadónan, i e fornikadónan i e hasidónan di braha, i e adoradónan di dios falsu i tur gañadó, nan parti lo ta den e lago ku ta kima ku kandela i swafel, kual ta e di dos morto" (Revelashon 21:8). Dios perfektamente hustu no por pèrmití piká na shelu, òf e lo no ta shelu mas! Ma mormonnan no ta interesá den siñansa di Beibel. Segun nan, e hendenan aki tambe lo yega shelu despues di pasa den e purgatorio mormon i wòrdu husgá na fin di e milenio: "Tòg, esakinan, despues di ta kastigá pa nan pikánan i a wòrdu entregá na e tormentunan di Satanas, eventualmente lo sali, despues di e milenio, pa risibí e reino telestial."<sup>13</sup>

E shelu aki ta hopi diferente for di e shelu di Beibel, pasobra ni Dios ni Kristo t'ei. "I nan lo ta sirbidónan di e Altísimo, ma unda Dios i Kristo ta biba nan no por yega, hamas i nunca" (*Doktrina i Aliansanan* 76:112). Di bèrdat, shelu por ta shelu sin Dios?

## C. E Reino Terestrial

E reino terestrial ta e di dos shelu segun doktrina mormon. E reino aki probablemente ta lokalísá riba un otro planeta. Ken ta e hendennan ku lo por habitá e shelu aki?

E kontesta ta ku nan ta mas bon hende ku esnan ku ta bai den e reino telestial, ma ménos bon ku esnan ku ta drenta e reino selestial. Por ehèmpel, nan ta mormonnan ku no tabata suficiente deboto na nan iglesia, nan ta bon hende ku siegá pa nan religion no a aseptá e evangelio mormon, nan ta hende ku no tabatin chèns pa tende e evangelio mormon, nan ta hende ku a rechasá e evangelio mormon den e bida aki ma a asepté den e mundu di spiritu despues di nan morto.<sup>14</sup>

E shelu aki tampoko no ta e shelu di Beibel pasobra akinan tin "e presensia di e Yu ma no e totalidat di e Tata" (*Doktrina i Aliansanan* 76:77). Un otro desbentaha di e shelu aki pa mormonnan ta ku "e poder di prokreashon (engendrá i haña yu) lo ta kitá. Ami ta komprendé ku hende hòmbèr i hende muhé den e reino aki lo...ta ni hòmbèr ni muhé, solamente sernan ku a risibí e resurekshon."<sup>15</sup>

#### **D. E Reino Selestial**

E reino selestial ta e shelu mas glorioso ku tur bon mormon ta aspirá pa alkansá. E shelu aki lo ta lokalísá riba mundu despues ku el a wòrdu formá den un estado di gloria selestial. Solamente mormonnan ku "ta rekto, esnan ku tabata fiel pa kumpli ku e mandamentunan di Señor, i a wòrdu purifiká di tur nan pikánan"<sup>16</sup> por drenta e reino aki. "Ku muchu gusto Señor lo ke duna kada un bida etèrno, ma komo ku e bendishon ei ta bin solamente pa medio di mérito—dor di kumpli fiel e deber—solamente esnan ku ta digno lo risibié...Pa ser eksaltá bo mester warda henter lei."<sup>17</sup> Den e shelu aki sí nan lo por "...biba den presensia di Dios i Su Kristo pa semper i semper" (*Doktrina i Aliansanan* 76:62).

Nos tin ku komprendé tambe ku den e reino selestial tin tres repartishon. E dos partinan mas abou ta pa mormonnan ku no a kasa den tèmpep, sinembargu nan tabata fiel siguidónan di siñansa di e Iglesia di Hesukristo di e Santunan di e Deláster Dianan. "Solamente esnan ku ta seyá den un aliansa nobo i etèrno di matrimonio i ku despues ta warda e eksigensianan i kondishonnan di e aliansa lo yega na e shelu di mas haltu den e tres shelunan den e reino selestial."<sup>18</sup>

Pues pa yega e nivel di mas haltu den e reino selestial, e mormon mester ta seyá pa medio di un matrimonio selestial den un tèmpep mormon. Esaki di bèrdat ta un nivel hopi haltu pasobra esnan ku ta alkansá no solamente lo ta huntu ku Dios, ma nan lo *bira* un dios! "P'esei, manera ta skirbí, nan ta diosnan, asta e yunan di Dios" (*Doktrina i Aliansanan* 76:58). I siendo un dios, e lo bira ku su esposa-diosa i su yunan, i nan lo sigui haña yunan spiritu pa tur etèrnidat.

"Pa bira manera e (Tata) nos mester tin tur e podernan di divinidat; pues un hòmbèr i su esposa ora nan ta glorifiká lo tin yunan spiritu ku eventualmente lo bai na un mundu manera esun ku nos ta habitá i pasa dor e mésun tipo di eksperensianan...No tin fin di e desaroyo aki; e lo sigui pa semper. Nos lo bira diosnan i tin poseshon di mundunan, i e mundunan aki lo wòrdu poblá dor di nos mes desendientenan. Nos lo tin un etèrnidat sin fin pa esaki."<sup>19</sup>

Kontrali na esnan ku ta yega na bira un dios i ta sigui haña yu pa tur etèrnidat, esnan ku ta yega na e reino selestial pero no na divinidat lo ta méskos ku esnan ku ta yega na e reinonan telestial òf terestrial. "Nan lo bira 'apart i soltero' den un estado no kasá 'sin eksaltashon, den nan kondishon salbá, pa tur etèrnidat'"<sup>20</sup> Pues nan no por ta kasá ni engendrá òf haña yu pa tur etèrnidat.

Pues, segun doktrina mormon, tin un lugá di sufrimentu i tres shelu. Solamente un porsentahe chikitu di hende lo no por drenta un di e tres shelunan. Una bes un pèrsona ta bai na un òf otro shelu, lo no tin oportunidat pa kambia mas. Den otro palabra no ta pusibel pa un pèrsona ku ta den e shelu telestial avansá te porfin e ta yega na e shelu terestrial òf selestial. Joseph Fielding Smith a deklará:

"No tin avanse for di e mas abou pa e mas haltu. E pregunta a wòrdu hasí si ta pusibel pa un (pèrsona) ku ta eredá e gloria telestial por avansá te yega na e gloria selestial ku tempu? Kontesta pa e pregunta aki ta, Nò!"<sup>21</sup>

Sinembargu, lo tin oportunidat pa avansá i krese den e mésun shelu unda bo ta.



- 
- 1
  - 2
  - 3
  - 4
  - 5
  - 6
  - 7
  - 8
  - 9
  - 10
  - 11
  - 12
  - 13
  - 14
  - 15
  - 16
  - 17
  - 18
  - 19
  - 20
  - 21